

摘藻堂四庫全書薈要

史部

欽定四庫全書薈要卷九千六百二十二

史部

文獻通考卷三百

鄱陽馬端臨貴與著

物異考六

金異

周威烈王二十三年九鼎震顯王三年雨金於櫟陽
赧王五十九年周亡秦昭王取九鼎其一飛入泗水
餘八入於秦中

漢武帝元鼎元年夏五月得鼎汾水上 四年六月得

寶鼎 元封元年詔曰朕禮首山昆田出珍物化或為

黃金

應劭曰昆田首山之下田也武帝祠首山故神為出珍物化為黃金

征和二年春

涿郡鐵官鑄鐵鐵銷皆飛去此火為變使之然也其三

月涿郡太守劉屈氂為丞相後坐祝詛腰斬 成帝河

平二年正月沛郡鐵官鑄鐵鐵不下隆隆如雷聲又如

鼓音工十三人驚走音止還視地地陷數尺鑪分為十

一鑪中銷鐵散如流星皆上去與征和二年同象其夏

帝舅五人封列侯元舅王鳳擅政譖殺丞相王商京兆
尹王章許后坐廢趙飛燕為后賊害皇子成帝亡嗣一
曰鐵飛屬金不從革按鑄鐵而鐵不成正金不從革之
異也而西漢五行志以為火不炎上誤矣今並革而正
之

後漢明帝永平六年二月王雒山出寶鼎廬江太守戲
之詔以初祭之日陳鼎於廟以備器用賜三公以下帛
有差 十一年灑湖出黃金廬江太守以戲

湖在廬州
合肥縣

章帝建初七年幸槐里岐山得銅器形似酒樽獻之
魏明帝青龍中盛修宮室西取長安金狄承露盤盤折
聲聞數十里金狄泣於是因留霸城此金失其性而為
異也

吳孫權赤烏十二年寶鼎出臨平湖 孫休永安三年
得大鼎於建德縣

晉惠帝元康三年閏二月殿前六鐘皆出涕五刻止前
年賈后殺楊太后於金墉城而賈惡不止故鐘出涕猶

傷之也 永興元年成都伐長沙每夜戈戟鋒有火光如懸燭此輕人命好攻戰金失其性而為變也天戒若曰兵猶火也不戢將自焚成都不悟終以敗亡 懷帝

永嘉元年項縣有魏豫州刺史賈逵石碑生金可採此金不從革而為變也五月汲桑作亂郡寇颺起又清河王覃為世子時所佩金鈴忽生起如粟者康王母疑不祥毀棄之及後為惠帝太子不終於位為司馬越所殺程氏演繁露曰晉語云墓碑生金庾氏大忌初不

曉生金為何等語按吳淑事類賦引魏志曰繁昌
縣傳禪碑中生金表送上羣臣盡賀王隱晉書曰
永嘉中陳國項縣賈逵石碑中生金人盜鑿取以
賣賣已復生此江東之瑞也其曰瑞者晉為金行
故金生為祥元帝中興其應也据此而言則碑中
誠生黃金矣亦異事哉

元帝永昌元年甘卓將襲王敦既而中止及還家多變
怪照鏡不見其頭此金失其性而為妖也尋為敦所襲

遂夷滅 石季龍時鄴城鳳陽門上金鳳凰二頭飛入

漳河 海西太和中會稽山陰縣起倉鑿地得兩大船
滿中錢錢皆輪文大形時日向暮鑿者馳以告官官夜
遣防守甚嚴至明旦失錢所在惟有船存視其狀悉有
錢處 安帝義熙初東陽太守殷仲文照鏡不見其頭
尋亦誅翦占與甘卓同也

陳後主禎明二年五月東冶鐵鑄有物赤色大如斗自
天墜鎔所隆隆有聲鐵飛破屋而四散燒人家東冶者

陳人鑄兵之所鐵飛為變者金不從革之應天戒若曰
陳國小兵弱云其後卒亡

隋堯君素守蒲州兵器夜有光如火火鑠金金所畏也
敗亡之象

劉武周據并州兵勢甚盛城上稍刃夜每有火光

唐垂拱三年七月魏州地出鐵如船數十丈廣州雨金
金位正秋為刑為兵占曰人君多殺無辜一年兵災於
朝 神龍初東都白馬寺鐵像頭無故自落於殿門外

天寶十載六月大同殿前鐘自鳴占曰庶雄為亂宰
臣李適之常列鼎具饕羞中夜鼎躍出相鬪不解鼎耳
及足皆折 乾元二年七月渾天儀有液如汗下流

元和中翰林院有鈴夜中文書入則引之以代傳呼長
慶中河北用兵鈴輒自鳴與軍中息耗相應聲急則軍
事急聲緩則軍事緩 光化四年冬武德殿前鐘聲忽
嘶啞天復元年九月聲又變小

後唐天成中偽漢欽州羅浮山民掘得古劍有篆文曰

已與水同宮王將耳口同尹來居口上山岫護重重以
獻偽主劉龔國人莫之辨及平廣南競傳其言知者云
太宗以已亥年降誕是已水同宮也於文耳口王為聖
尹口為君重山為出蓋已亥年聖君出也

晉開運三年六月登州文登縣地內湧出金銅佛像四
漢乾祐元年三月中書厨釜鳴者七是月宰相李濤罷
免勒歸私第

宋建隆二年七月晉江神山縣北谷中有鐵隨水流出

方二丈三尺其重七十斤 至道二年二月桂陽監鎔
銀自湧成山峯狀 咸平四年十二月亳州大清真宮鐘
自鳴 大中祥符六年九月臨江軍清江縣民李公邁
至雲騰廟前過遇小童贈塊土還家剖之得天尊人主
像五軀 慶歷四年五月乙亥撫州金谿縣得生金山
重三百二十四兩 至和五年正月湖南提舉常平劉
欽言蘆荻衝出生金重九斤八兩狀類靈芝祥雲又淘
得碎金四百七兩有奇十一月越州言民戶拾生金湟

州丁羊谷金坑僅千餘眼得鑛成金共四等計一百三

十四兩有奇 崇寧四年三月鑄九鼎用金甚厚取九

州水土內鼎中既奉安於九成宮車駕臨幸徧禮焉至

北方之寶鼎忽漏水溢於外劉炳諺曰正北在燕山今

寶鼎但取水土於雄州境宜不可用其後竟以北方致

亂 建炎三年吉州修城役夫得髑髏棄之水中俄浮

一鐘有銘七十六字大畧云唐興元吾子歿瘞廬陵西

壘後當火德五九之際世衰道敗浙梁相繼喪亂章貢

康昌之日吾亦復出是邦東平鳩工復使吾子同河伯
聽命水官時郡守命錄之僅錄畢而鐘自碎近金為變
怪也 紹興十一年主管成都等路茶事馮康國言三
月庚申金人居長安兵刃皆生火光天變豈直示金亦
示國家以恢疆之圖此與晉志永興初成都伐長沙戈
戟火光及唐志劉武周稍刃火光同占輕人命好攻戰
金失其性為光怪也兵猶火也弗戢自焚敗亡象也
二十六年七月辛酉夜天雨水銀與唐志貞觀廣州雨

金同占金位正秋為刑為兵占曰人君多殺無辜一年
災於朝是歲成都郫縣地出銅馬高三尺工制甚精中
宵風雨輒聞嘶聲 紹興中秦檜別墅農夫耕鑿得金
甕重二十四鈞 慶元二年正月泰寧縣耕夫得鏡厚
三寸徑一尺二寸照水徹底對日爭輝病熱者鑑之心
骨生寒後為雷震而碎十二月吳縣金鵝鄉銅錢百萬
自飛漢書陰盛陽微金鐵為飛

玉石之異

春秋昭公八年春石言於晉晉平公問師曠對曰石不能言神或馮焉作事不時怨讎動於民則有非言之物而言於是晉侯方築虎祁之宮

虎祁地在絳西臨汾水

劉歆以為

金石同類是為金不從革失其性也劉向以為石白色為主屬白祥 昭公二十四年王子鼂以成周之寶湛

於河津人得之河上陰不佞取將賣之則化為石

見白祥門

漢孝昭元鳳三年泰山有大石起立

詳見白祥門

成帝鴻

嘉三年五月乙亥天水冀南山大石鳴聲隆隆如雷有

項止聞平襄二百四十里許埜雞皆鳴石長丈三尺廣厚略等旁著岸脅去地二百餘丈民俗名曰石鼓石鼓鳴有兵是歲廣漢鉗子謀攻牢

鉗子謂鉗徒牢係重囚處

篡死囚鄭

躬等盜庫兵劫掠吏民後四年尉氏樊並等謀反殺陳留太守山陽亡徒蘇令等黨與數百人盜庫兵經歷郡國四十餘皆踰年乃伏誅時起昌陵作者數萬人徒吏民作治五年不成與晉石言同應師曠所謂民力彫盡傳云輕百姓者是也

魏明帝青龍元年張掖柳谷口水溢涌寶石負圖狀象
靈龜立於川西有石馬七及鳳麒麟白虎犧牛璜玦八
卦列宿孛彗之象又有文曰大討曹此晉之符命而於
魏為妖好攻戰輕百姓飾城郭侵邊境魏氏三祖皆有
其事石圖發於非常之文此不從革之異晉定大業多
斃曹氏石瑞文大討曹之應也

吳孫亮五鳳二年陽羨離里山大石自立 孫皓天璽

元年鄱陽言歷陽山石文理成字凡二十云楚九州渚

吳九州都揚州士作天子四世治太平始

江左傳曰歷陽縣有石山

臨水高百丈其三十丈所有土穿駢羅穿中色黃赤不與本體相似俗相傳謂之石印又云石印封發天下當太平有祠屋巫祝言石印神有三郎時歷陽長表上言石印發皓遣使以太牢祭歷山巫言石印三郎說天下方太平使者作高梯上看印文詐以朱書石作二十字還以啟皓皓大喜曰吳當為九州作都渚乎從大皇帝逮孤四世矣太平之主非孤復誰重遣使以印綬拜三郎為王又刻石立銘褒贊靈德以答休祥

又吳

興陽羨山有空石長十餘丈名曰石室在所表為大瑞乃遣兼司徒董朝兼太常周處至陽羨縣封禪國山明年改元大赦以協石文

晉惠帝永熙五年有石生於京師宜年里永康元年

襄陽得鳴石丹陽湖有浮石真定獲玉馬

詳並見
白祥門

元

帝初渡江有玉冊見於臨安白玉麒麟神璽出於江寧
其文曰長壽萬年皆以為中興之驗焉愍帝建興五
年石言於平陽時帝蒙塵亦在平陽故有非言之物而
言妖之大者俄而帝遇害

劉曜時終南山崩長安人劉終於崩所得白玉方一
尺有文字曰皇亡皇亡敗趙昌井水竭構五梁罅

五各

反

酉小衰困囂喪嗚呼嗚呼赤牛奮鞞

直引反

其盡乎

時羣下咸賀以為勒滅之徵曜大悅齋七日而後受
之於太廟大赦境內以終為奉瑞大夫中書監劉均
進曰臣聞國主山川故山崩川竭君為之不舉終南
京師之鎮國之所瞻無故而崩其凶焉可極言昔三
代之季其災也如是今朝臣皆言祥瑞臣獨言非誠
上忤聖旨下違衆議然臣不達大理竊所未同何則
王之於山石也猶君之於臣下山崩石壞象國傾人

亂皇亡皇亡敗趙昌者此言皇室將為趙所敗趙因之而昌今大趙都於秦雍而勒跨全趙之地趙昌之

應當在石勒不在我也井水竭構五梁者井謂東井秦之分也五謂五車梁謂大梁五車大梁趙之分也

此言秦將竭滅以構成趙也呬者歲之次名作呬也

言歲馭作呬酉之年當有敗軍殺將之事困謂困敦

丁回反 歲在子之名元囂亦在子之次言歲馭於子國

當喪亡赤牛奮鞠謂赤奮若在丑之歲名也牛謂牽

牛東北維之宿丑之分也言歲在於丑當滅亡盡無復遺也此其誠悟蓋欲陛下勤修德化以禳之

石虎時青州言濟南平陵城北石虎一夜中忽移在城東南善石溝上有狼狐千餘迹隨之跡皆成路虎大悅曰石虎者朕也自北而南者天意將使朕平蕩江南也其勅諸州兵明年朕當親董六軍以副成路之祥羣臣皆賀又有石燃於泰山八日而滅東海有大石自立旁有血流鄴西山石間血流血長十餘步

廣二尺餘

慕容儁既僭位初石虎使人探策於華山得玉版文
曰歲在申酉不絕如綫歲在壬子真人乃見及此燕
人咸以為儁之應也又常山大樹自拔根下得璧七
十珪七十玉光色精竒有異常玉儁以為岳神之命
遣其尚書段勤以太牢祀之

齊高祖受禪之日滎陽郡人尹千於嵩山東南隅見天
雨石墜地石開有玉璽在其中璽方三寸文曰戊丁之

人與道俱肅然入草應天符掃平河洛清魏都又曰皇
帝運興千奉璽以獻按宋武帝於嵩高山得玉璧三十
二枚神人云此是宋分世之數三十二年二三十也宋
自受命至禪齊凡六十年云

梁武帝中大同元年春曲阿縣建陵隧口石辟邪起舞
後齊武成河清四年殿上石自起兩兩相對

唐貞觀十七年八月涼州昌松縣鴻池谷有石五青質
白文成字曰高皇海出多子李元王八十年太平太子

李世民千年太子李治書燕山人士樂太國主尚汪譚

獎文仁邁千古大王五王六王七王十鳳毛才子七佛

八菩薩及上果佛田天子文武貞觀昌大聖延四方上

不治示孝仙戈八為善太宗遣使祭之曰天有成命表

瑞貞石文字昭然歷數惟永既旌高廟之業又錫眇身

之祚迨於皇太子治亦降貞符具紀姓氏甫為寡薄彌

增寅懼昔魏以土德代漢涼州石有文石金類以五勝

推之故時人謂為魏氏之妖而晉室之瑞唐亦土德王

石有文事頗相類然其文初不可曉而後人因推已事以驗之蓋武氏革命自以為金德王其佛菩薩者慈氏金輪之號也樂太國主則鎮國太平公主安樂公主皆以女亂國其五王六王七王者唐世十八之數 開元二十三年十二月己巳龍池聖德頌石自鳴其音清遠如鐘磬近石言也 至德二年昭陵石馬汗出昔周武帝克晉州齊有石像汗流濕地此其類也 上元二年楚州獻寶玉十三曰元黃天符形如笏長八寸有孔云

辟兵疫曰玉雞毛白玉也曰穀璧亦白玉也粟粒自然

無雕鐫迹曰西王母白環二曰如意寶珠大如雞卵曰

紅靺鞨大如巨栗曰琅玕珠二形如玉環四分缺一曰

玉印大如半手理如鹿陷入印中曰皇后採桑鉤如箸

屈其末曰雷公石斧無孔其一闕凡十三置之日中白

氣連天 元和中文水武士獲碑失其龜頭 太和三

年南蠻圍成都毀玉晨殿石為礮有吼聲三乃止 四

年浙西觀察使王蟠治潤州城隍中得方石有刻文曰

山有石石有玉玉有瑕瑕即休 廣明元年華嶽廟元宗御製碑隱隱然有聲聞數里間浹旬乃止近石言也

南漢劉鋹時宮中井旁石自立行百餘步而仆

宋太平興國四年九月嘉州夾江縣民王詣得江石二皆黝質丹文隱起成字一曰君王萬歲一曰趙二十一

帝 三年四月華州言秦嶺南石洞自開遣吏馬文則秉炬視之入數十步得丹砂千二百粒獸形石六以獻

五年五月鄭州修東嶽祠穿土得玉杵白 七年六

月深州陸澤縣民王緒田中得白兔逐入穴掘之得石

佛五十軀皆長尺餘 大中祥符五年四月慈州民饑

鄉寧縣山生石脂如麵可為餅餌 天禧三年正月晦

潁州沈丘縣民駱新田間震雷頃之隕石三入地七尺

許 政和二年玄圭始出晉州上一石綠色方三尺餘

當中有文曰堯天正其字如掌大而端楷類手畫者堯

字居右天正字綴行如左都堂驗視礮石三分而字畫

愈明又於堯字之下隱約出一瑞字位置始均蓋曰天

正堯瑞云或謂晉陽堯都也方玄圭出乃有此瑞殆宣

和內禪之祥 政和三四年畿府汝蔡之間連山大小

石皆變為瑪瑙尚方取為寶器玩甚富至宣和四年後

御府所藏徃徃復變為石而色類白骨此與周寶圭占

略同 五年鄭州滎陽縣賈谷山麒麟谷採石修明堂

得一石有文曰明百官表賀 七年二月丙戌張杲言

北嶽廟於廟側二十里黃山獲石柱十六條修短濶狹

皆應營造法式用建正門毫釐不差 建炎三年四月

鼎州桃源洞大水巨石隨流而下石間成文或識者三
十二字其文曰無為大道天知人情無為窈冥神見人
形心言意語鬼聞人聲犯禁滿盈地收人魂具唐志貞
觀中鴻池谷石文同占 紹興元年潭州得白玉於州
城蓮池中孔彥舟以獻於朝詔却之漢志以為玉變近
白祥與石怪同占後彥舟為劇盜 乾道二年三月丙
午夜福清縣石竹山大石自移聲如雷石方可九丈所
過成蹊纔四尺而山之草木如故 慶元二年六月辛

未黃巖縣大石自隕雷雨甚至山水湧出

白青白祥

天雨毛地生毛

春秋左傳昭公二十四年十月癸酉王子鼃以成周之

寶圭湛於河

以祭河也

幾以獲神之助甲戌津人得之河上

陰不佞取將賣之則為石時王子鼃篡天子位萬民不
鄉號令不從故有玉變近白祥也癸酉入而甲戌出神
不享之驗云玉化為石貴將為賤也後二年子鼃奔走
而死

秦始皇二十六年鄭客遇江神持壁言祖龍死事

詳見人異

與周子鼃同應是歲石隕東郡民或刻其石曰始皇死而地分此皆白祥炆陽暴虐號令不從孤陽獨治羣陰不附之所致其歲始皇死後三年秦滅

漢孝昭元鳳三年正月泰山萊蕪山南匈匈有數千人聲民視之有大石自立高丈五尺大四十八圍入地深八尺三石為足石立處有白鳥數千集其旁眚孟以為石陰類下民象泰山岱宗之嶽王者易姓告代之處當

有庶人為天子者孟坐伏誅京房易傳曰復崩來無咎

復卦之辭今

易作朋來

自上下者為崩厥應泰山之石顛而下

顛墜

也聖人受命人君虜又曰石立如人庶士為天下雄立

於山同姓平地異姓立於水聖人於澤小人

武帝天漢元年三月天雨白毛三年八月雨白雉京

房易傳曰前樂後憂厥妖天雨羽又曰邪人進賢人逃

天雨毛

吳孫亮五鳳二年五月陽羨縣離里山大石自立按京

房易傳曰庶士為天子之祥也其說曰立石於山同姓平地異姓干寶以為孫皓承廢故之家得位其應也或曰孫休見立之祥也

晉武帝泰始八年五月蜀地雨白毛此白祥也時益州刺史皇甫晏伐汶山胡從事何旅固諫不從牙門張弘等因衆之怨誣晏謀逆害之京房易傳曰前樂後憂厥妖天雨羽又曰邪人進賢人逃天雨毛其易妖曰天雨毛羽貴人出走三占皆應 太康十年洛陽宮西宜秋

里石生地中始高三尺如香爐形後如偃

於武反

人盤薄

不可掘按劉向說此白青也明年宮車晏駕王室始騷

卒以亂亡京房易傳曰石立如人庶士為天下雄此近

之矣 惠帝元康五年十二月有石生於宜年里 永

康元年襄陽郡上言得鳴石撞

宅江反

之聲聞七八里

永寧元年齊王冏舉義軍軍中有小兒出於襄城繁昌

縣年八歲髮體悉白頗能卜於洪範白祥也 太安元

年丹陽湖熟縣夏架湖有大石浮二百步而登岸民驚

噪蘇到

反

相告曰石來干寶曰尋有石冰入建業車騎大

將軍東嬴王騰自并州遷鎮鄴行次真定時久積雪而
當門前方數丈獨消釋騰怪而掘之得玉馬高尺許口
齒缺騰以馬者國姓上送之以為瑞然馬無齒則不得
食妖祥之兆衰亡之徵按占此白祥也是後騰為汲桑
所殺而天下遂亂 成帝咸康初地生毛近白祥也孫
盛以為人勞之異也是後石季龍滅而中原向化將相
皆甘心焉於是方鎮屢革邊戍仍遷皆擁帶部曲動有

萬數其間征伐徵賦役無寧歲天下勞擾百姓疲怨

咸康三年六月地生毛 孝武太元二年五月京都地

生毛至四年而氐賊次襄國圍彭城向廣陵征戍仍出

兵連年不解 太元十四年四月京都地生毛時苻堅

滅後經畧多事人勞之應也 十七年四月地生毛

安帝隆安四年四月乙未地生毛或白或黑 元興三

年五月江陵地生毛是後江陵見襲 義熙三年三月

地生白毛 十三年三月地生毛明年王旅西討司馬

休之又明年北掃關洛

梁武帝大同二年地生白毛長二尺近白祥也孫盛以
為人勞之異先是大發卒築浮山堰功費鉅億垂成復
潰百姓怨嗟 太清二年九月地生白毛長二尺時候
景舉兵反

後齊河清元年九月滄州及長城之下地多生毛或白
或黑長四五寸近白祥也時北築長城內興三臺人苦
勞役 天統初岱山封禪壇玉壁自出近白祥也岱山

王者易姓告代之所玉璧所用幣而自出將有易姓者
用幣之象其後齊亡地入於周隋高祖受周禪天下一
統焚柴泰山告祠之應 武平三年白水巖下青石壁
旁有文曰齊亡走人改為上延後主以為嘉瑞百僚畢
賀後周師入國後主棄鄴而走

隋文帝開皇六年七月京師雨毛如髮尾長者三尺餘
短者六七寸京房易飛候曰天雨毛其國大饑時關中
旱米粟踴貴 十七年石隕於武安滏陽間十餘洪範

五行傳曰石自高隕者君將危殆後七年帝崩 開皇
末高祖於宮中埋二小石於地以誌置牀之所未幾變
為玉劉向曰王者至貴也賤將為貴之象及大業末盜
皆僭名號 煬帝大業十三年西平都石文曰天子立
千年百僚稱賀識者尤之曰千年萬歲者身後之意也
今稱立千年者禍在非遠明年而帝被殺

唐調露元年十一月壬午秦州神亭治北霧開如日初
暉有白鹿白狼見近白祥也 垂拱元年九月淮南地

生毛或白或蒼長者尺餘遍居人牀下揚州尤甚大如馬鬣焚之臭如燎毛占曰兵起民不安 神龍二年四

月己亥雨毛於越州之鄞縣占曰邪人進賢人遁 大

歷二年七月甲戌日入時有白氣亘天九月戊午夜白霧起西北亘天 五年五月甲申西北有白氣亘天

建中四年四月甲子京師地生毛或黃或白有長尺餘者 貞元四年四月淮南及河南地生毛 二十年九

月庚辰甲夜有白氣八東西際天 太和三年八月西

方有白氣如柱 六年二月蘇州地震生白毛 七年
十月己酉西方又有白氣如柱者三 光啟二年四月
有白氣頭黑如髮自東南入於揚州滅 光化二年三
月乙巳日中有白氣亘天自西南貫於東北 天復元
年八月己亥西方有白雲如履底中出白氣如足練長
五丈上衝天分為三彗頭下垂占曰天下有兵白者戰
祥也

宋嘉祐七年三月徐州彭城縣白鶴鄉地生麵占曰地

生麵民將饑五月濠州鍾離縣地生麵 熙寧元年荆

襄間天雨白黿如馬尾長者尺餘彌漫山谷三月丁酉

潭州雨毛 八年五月丁丑雨黃毛 元豐三年五月

青州臨朐益都石化為麵民取食之 靖康二年二月

壬午夜四鼓白氣如虹自南亘北須臾移西南至東北

天明而沒 建炎二年杜充為北京留守一日天雨紙

錢於營中厚盈寸明日與金人戰於城下敗績錢金類

金兵象紙白祥也 三年三月白氣貫日未幾苗傅等

作亂凡白氣之占皆為天下有兵戰之事白祥也 四

年五月壬子夜北方有白氣十餘道如練

語在赤祥

紹興

元年二月己巳夜東南有白氣 十一年馮康國言三

月庚申金人居長安油酒皆變白色

語在金傳及夜妖

此白祥

也白者西方兵象也亦喪祥也後金酋亶為其下所弑

三十年十一月甲午夜西南有白氣出危入昴十二

月戊申白氣出尾入軫貫天市垣 三十一年十二月

辛丑白氣如帶東西亘天出斗歷牛 隆興元年十二

月壬午夜白氣見西南方出危入昴 二年正月甲寅

夜西南有白氣亘天如帶 乾道元年正月庚午白氣

見西北方出奎入參三月戊辰夜白氣如帶自參及角

東西亘天四月丁酉夜白氣見西北方入天市垣辛丑

夜白氣入北斗乙巳夜白氣入紫微垣十月己丑夜蒼

白氣見南方入翼十一月丙寅白氣如帶出女入昴東

西亘天 二年十二月庚午夜白氣如帶東西亘天出

女入昴 淳熙十年正月戊子夜西南有白氣如天漢

而明南北廣可六丈東西亘天歷壁至畢 紹熙五年

六月壬寅夜白氣亘天自紫微至亢角巳酉日入後白

氣亘天頃刻而散 慶元五年二月癸酉夜東北方白


氣如帶自角至參八月甲子東北方有白氣如帶亘天

嘉泰四年十一月壬申晝有白氣分數道亘天 紹

熙四年十一月癸酉地生毛占曰兵起民不安後一年

韓侂胄用事卒有開邊毒民之禍

文獻通考卷三百



總校官庶吉士臣張能照

校對官修撰臣張書勳

膳錄監生臣周志禮

欽定四庫全書會要

史部

文獻通考卷三百

二

詳校官員外郎臣潘紹觀



欽定四庫全書會要卷九千六百二十三

史部

文獻通考卷三百一

鄱陽馬端臨貴與著

物異考七

歲凶

即五行所謂稼穡不成也然則歲凶年穀不登蓋土失其性所致而地震山崩之屬亦土失其性也故以繼歲凶之後

春秋莊公二十八年冬大水亡麥禾劉向以為水旱當書不書水旱而曰大亡麥禾者土氣不養稼穡不成也

時夫人淫于二叔内外亡別

二叔謂莊公二弟仲慶父及叔牙

又因凶

飢一年而三築臺故應稼穡不成飾臺榭内淫亂之罰云

秦始皇十六年民大飢 十九年大飢

漢高祖二年關中大飢米斛萬錢人相食令民就食蜀

漢武帝建元三年平原大飢人相食 元鼎三年四

月關東郡國四十餘飢人相食 元帝初元元年九月
關東郡國十一飢或人相食轉旁郡穀以相救 二年
六月關東飢齊地人相食

王莽地皇時天下大飢寇盜蜂起

後漢光武二年關中飢人相食 安帝永初三年京師

大飢民相食 桓帝延熹九年司隸豫州飢死者什四

五至有滅戶者 獻帝興平二年關中大飢人相食啖

白骨委積

吳孫皓時常歲無水旱苗稼豐美而實不成百姓以飢
闔境皆然連歲不已吳人以為傷露非也劉向春秋說
曰土氣不養稼穡不成此其義也皓初遷武昌尋還建
鄴又起新館壯麗過甚犯暑妨農官私疲怠月令季夏
不可興土工皓皆冒之此修宮室飾臺榭之罰也

晉愍帝建興四年京師大飢 元帝大興二年吳郡吳
興東陽無麥禾大飢 成帝咸和五年無麥禾天下大
飢 穆帝永和十年二麥不登 十二年大無麥 孝

武太元六年無麥禾天下大飢 安帝元興元年無麥

禾天下大飢

北齊後主武平四年山東飢時大興土木窮侈極麗後宮侍御千餘人皆寶衣玉食逆中氣之咎

隋煬帝大業五年燕代齊魯諸郡飢先是建立東都制度崇侈又宗室諸王多遠徙邊郡

唐貞觀元年關內飢 總章二年諸州四十餘飢關中尤甚 儀鳳四年春東都飢 調露元年秋關中飢

永隆元年冬東都飢 永淳元年關中及山南州二十

六飢京師人相食 垂拱三年天下飢 大足元年春

河南諸州飢 景龍二年春飢 三年三月飢 先天

二年冬京師岐隴幽州飢 開元十六年河北飢 乾

元三年春飢米斗錢千五百 廣德二年秋關輔飢米

斗千錢 永泰元年飢京師米斗千錢 貞元元年春

大飢東都河南河北米斗千錢死者相枕 二年五月

麥將登而雨霖米斗千錢 十四年京師及河南飢

十九年秋關輔飢 元和七年春飢 八年廣州飢

九年春關內飢 十一年東都陳許州飢 長慶二年

江淮飢 太和四年河北及太原飢 六年春劔南飢

九年春飢河北尤甚 開成四年溫台明等州飢

大中五年冬湖南飢 六年夏淮南飢海陵高郵民於

官河中漉得異米號聖米 九年秋淮南飢 咸通三

年夏淮南河南飢 九年秋江左及關內飢東都尤甚

乾符三年春京師飢 中和二年關內大飢 四年

關內大飢人相食 光啓二年二月荆襄大飢米斗三

千錢人相食 三年揚州大飢米斗萬錢 大順二年

春淮南大飢 天祐元年十月京師大飢

宋明道二年南方大旱種粒皆絕人多流亡因飢成疫

死者十二三官作粥糜以飼之然得食者輒死墟里幾

為之空 建炎元年汴京大飢米升錢三百一鼠之直

數百錢人啖道殣骸無餘皆取水藻春槐葉以食 三

年山東郡國大飢人相食時金人陷京東諸郡民聚為

盜至車載乾尸為糧 紹興元年行在越州及東南諸

路郡國飢

令郡發常平倉粟以賑勸分禁過糴

淮東京東西流民聚常州

平江府者多殍死

亦令各郡賑之

二年春兩浙福建飢米斗

千錢

令憲臣移廣粟以賑

時餽餼繁急民益艱食

詔漕江東西上供粟給軍餼以

寬浙

三年吉邨道州桂陽監飢

皆令宣諭使賑之流民之聚湖南者令憲

臣賑

五年湖南大飢殍死流亡者衆

詔移粟減賦令漕臣賑之夏

潼川路飢米斗二千人食糟糠興元飢民流於果閬

令漕

臣賑

秋溫處州飢

漕閩粟萬石以賑

六年春浙東福建飢湖

南江西大飢殍死甚衆民多流徙郡邑盜起

令帥臣部使者賑粟

勸分且漕廣粟以助

夏四月蜀亦大飢米斗二千利路倍之道殢

枕藉

令帥臣賑粟蠲賦是歲果州守臣宇文彬獻禾粟九穗圖吏部侍郎晏敦復言果遂飢民未蘇不宜

導諛坐黜爵

七年夏欽廉邕州飢

令常平使者賑粟

九年江東

西浙東飢米斗千錢饒信州尤甚

令出常平粟以賑

十年浙

東江南薦飢人食草木

令戶部條賑飢事下之諸路

十一年京西

淮南飢

令通商移粟

十五年汀虔州以盜妨農

令郡縣賑粟貸種

十八年冬浙東江淮郡國多飢

令諸道常平使者賑粟

紹興府

大飢民之仰哺于官者二十八萬六千人賑之不給人

食糟糠草木殍死殆半流民渡江至行都事上聞令臨

安府賑遣復業 十九年春夏紹興府飢流如初明婺

州亦飢

令常平使者賑集之

二十四年衢州飢 二十八年平

江府飢

二十九年紹興府薦飢

皆發常平義廩以賑

隆興元

年紹興府大飢四川尤飢民食蕨根平江襄陽府隨泗

州棗陽盱眙大飢隨棗間米斗六七千

令有司皆賑之粟

二

年平江府常秀州飢華亭縣人食粃糠行都及鎮江府

興化軍台徽州亦藉食

皆令守臣及常平使者賑之

淮民飢流江南

者數十萬人

詔內郡移粟施惠安集之

乾道元年春行都平江鎮

江紹興府湖常秀州大飢殍徙者不可勝計州縣為糜

食之行都城外為糜四十餘日數萬人是歲台明州江

東諸郡皆飢

令賑之粟

夏亡麥

二年夏亡麥

三年九月

不雨麥種不入 四年春蜀邛綿劔漢州石泉軍大飢

邛為甚盜延八郡漢飢民至九萬人

內出宸翰賜制置使汪應辰講行荒

政賜僧牒
四百助之

五年夏饒信州薦飢民多流徙徽州大飢

人食蕨葛台楚州盱眙軍亦飢

令郡守部使者發廩移粟勸分秋冬不

雨淮郡麥種不入 六年冬寧國府廣德軍太平温湖

秀池徽和州皆飢

今漕江西廣東粟以賑

七年秋江東西湖南

十餘郡飢江筠州隆興府為甚人食草實流徙淮甸

廩發

賑之不給詔立勸分賞格內出左帑增賑饒州出內帑收育棄孩

淮郡亦薦飢金虜謀

知運麥於淮北岸易南岸銅錙斗錢八千江西飢民流

光濠安豐間皆效淮人私糴淮錙為耗荆南亦艱食

宣撫

使下蜀粟以賑

八年江西亡麥隆興府薦飢南昌新建縣飢

民仰給者二萬八千餘人

先是去歲秋詔淮浙江湖諸路帥漕臣勸課二麥官借種

糧

九年春成都永康邛三州飢秋台州飢

發江西米數萬石以

賑溫婺州亦飢

令各郡賑粟禁遏糴是時郡國告飢詔盡發常平粟截上供賦以賑令帥漕臣

申勸種麥

淳熙元年浙東湖廣廣西江西蜀闕外皆飢台

處榔桂昭賀尤甚

令賑以常平義廩江西一道至六十二萬斛

二年淮東

西江東飢滁真揚州盱眙軍建康府為甚

詔賑以常平米弛賦通商

貨種糧勸布麥立勸分賞格

是歲鎮江寧國府常州廣德軍亦糴食

皆賑之粟

三年淮甸飢夏台州亡麥冬復施隨郢州荆門

軍襄陽江陵德安府大飢 四年春尤飢

令發屯田粟二萬六千五

百餘石以賑

六年冬和州飢泰通楚州高郵軍大飢人食

草木

皆賑之粟

七年鎮江府台州無為廣德軍民大飢

出令

常平米賑之賑廣德軍至於越歲之春弛兩歲帛賦

是歲江浙荆湘淮郡皆飢皆蠲

賦予粟或一道至十四五萬石

八年春江州飢人採葛而食

詔罷守臣章驛

冬行都寧國建康府嚴婺太平州廣德軍飢徽饒州流

徙入淮郡者萬餘人

令兩淮漕臣授田江東帥漕臣賑粟十一月辛卯內出庚牌下淮南

勸種麥遣使分行兩浙江東淮南南路賑贍安集之令江浙湖北行勸分賞格已亥浙東常平使者朱熹進對論

荒政請粟勸分及蠲田賦身丁錢上嘉納之十
二月戊申詔江浙淮湖北三十八郡並免之
九年

春大亡麥行都飢於潛昌化縣人食草木
出豐儲倉米萬石令尹臣

為糜以食之飢民之就食者一萬
四千五百人流民一千五百餘人浙西湖州浙東紹興

府衢婺嚴明台州飢徽州大飢種稔亦絕
令常平使者賑恤之湖

北七郡薦飢
令帥臣賑之蜀潼利夔三路郡國十八皆飢流

徙者數千人
令饒漕守臣分賑之十年合昌州薦飢
令饒漕臣賑以緡粟

恭州飢民就賑相踐死者三千餘人
十一年泉汀漳

州興化軍亡禾邕賓象州飢
令帥臣賑粟貸種十二年福建

飢亡麥江西廣東西飢

皆令帥臣賑粟

金州飢有流徙者

令郡賑之

十四年金洋階成鳳西和州人乏食

令漕臣賑之粟

七月秀

州飢有流徙者

詔出粟二萬斛令郡賑恤之

臨安府九縣飢

令發廩二十萬

石以賑

十六年夏成州亡麥冬階成鳳西和州薦飢

令

臣賑之乾道淳熙間上篤意民事勸課農桑宮中親蠶後苑種稼藝麥以驗歲功間取民間繭麥觀之或繭薄穗短則歎然為農婦不滿修圩浚渠廣勸種麥遇水旱之變則發廩予財蠲賦已責移粟勸分郡國殿最視荒救為升黜一時吏治篤厚風俗趨本奏對者多言農田水利方守血食之神非順成不加封爵歲雖小儉莫不疾呼於上發粟往哺競以民庸自見故荒政靡歲不聞然家給人足行都米斗五六十錢江淮荆襄粒米狼戾

蜀甦斤至十餘錢民物阜樂庶幾小康夫豈一日之積哉趙雄嘗奏得南康守臣朱熹書言荒政之行民戴上恩凶年化為樂歲上曰陳峴亦奏蜀雨暘時若民俗熙恬農事天下大本朕未嘗不念邇來士大夫方知以農事為重以虛浮為耻又曰朕不驚爵以清入仕之源惟以賑飢推官乃為民也

紹熙二年

州飢

令郡賑粟萬石

夔路五郡飢渝涪為甚

令漕臣賑粟七萬石殍者尚數千人

階成鳳西和州亡麥 三年資榮州亡麥普敘簡隆州

富順監皆大飢亡麥殍者甚衆流民聚成都府至千餘

人威遠縣棄兒且六百人為糜以食飢民八萬餘人多

不能活

詔出緡粟賑之

揚州亦飢

令出粟十萬石以賑

四年簡資普州

飢綿州亡麥今漕臣均賑夏紹興府亡麥安豐軍大亡麥

五年冬亡麥苗行都淮浙西東江東郡國皆飢常明州

寧國鎮江府廬滁和州為甚人食草木詔出帑廩驚僧牒益以漕計賑

之或一郡至五萬緡石不給航廣粟以續之令憲漕常平使者所部勸分免賦通商禁遏糴收棄兒慶

元元年春常州飢民之死徙者衆楚州飢人食糟粕淮

浙流民多聚於行都上念郡國賑恤未至詔部使者守令謹行荒政收哺遺幼免臨安紹

興慶元鎮江府常湖秀州江陰軍夏賦而賑之粟三年浙東郡國亡麥台州

大亡麥民飢多殍襄蜀亦飢 四年秋浙東西薦飢多

道殣 六年冬常州大飢仰哺者六十萬人潤揚楚通

泰州建康府江陰軍亦乏食

皆令守令賑之

嘉泰元年浙西

郡國薦飢常州鎮江嘉興府為甚

皆令常平使者賑之

二年四

川飢廣安懷安軍潼川府大亡麥

出川緡八十萬令帥臣賑之

衡郴

州武岡桂陽軍乏食 三年春邵永州大飢死徙者衆

民多剽盜

令常平使者賑之粟

夏行都難食

出豐儲倉米十萬石以賑

四年

春撫袁州隆興府臨江軍大飢殍死者不可勝瘞有舉

家二十七人同赴溺者

令郡發常平廩賑之部使者益以緡粟

開禧二

年紹興府衢婺州亡麥湖北京西淮東西郡國飢民聚

為剽盜

分命宣諭使賑恤

南康大安軍忠涪州皆飢

令部使者及守臣賑

粟

嘉定元年淮南大飢人食草木流徙江浙者百萬

人先是開禧開邊淮郡殘於兵火農久失業米斗二千

殍死者十三四炮人肉馬矢中以食詔所至郡國賑恤

歸業時邦儲亦匱郡計不支去者多死亦有為濠豐餘

虜俘掠而北者是歲行都亦飢米斗千錢

詔發廩廣糴賑糶勸分

二年春兩淮荆襄建康府大飢米斗錢數千人食草

木淮民刳道殣食盡發瘞皆繼之人相搯噬流徙之聚

於揚州者數千家渡江者聚建康殍死日八九十人

詔發

廩賑施皆十萬餘石令州郡置粥院為糜以活之

是秋諸路復大歉常潤尤甚

冬行都大飢殍者橫市道多棄兒

十二月甲戌令發粟賑施盡其月

三年春建康府大飢人相食五月衢州飢頗聚為剽盜

守臣孫子直平之勸分以賑

七年台州大亡麥

八年淮浙江東

西飢都昌縣飢民聚為盜者三十六黨

自秋至於明年夏縣官出錢三

百三十三萬緡粟四百八十五萬石以賑

九年行都飢閭巷有殍

令賑粟

十年台衢發饒信州飢多聚為剽盜台為甚蜀石泉

軍飢殍死殆萬人

皆令郡賑之

十一年秋淮浙江東飢僅

無麥苗 十二年春潼川府飢而不害 十三年春福

州飢人食草根

令郡賑之

十六年春海州新附山東民飢

令海州賑之

京東河北路新附山西民亦飢

令楚州賑之粟皆萬石

湖

南永道州大飢

令帥臣移粟以賑

是歲行都江淮閩浙郡國皆

無麥禾

十七年春餘杭錢塘仁和三縣飢

令帥臣賑之

鎮

江府飢郡為糜以賑者日千餘人真鄂州亦乏食

令通商勸

地震

史紀周幽王二年周三川皆震

應劭曰震地震三川竭也師古曰三川涇渭洛

也洛即漆沮也川自震耳故將壅塞非地震也劉向以為金木水火沴土者也

伯陽甫曰

服虔曰周太史

周將亡矣天地之氣不過其序若過

其序民亂之也陽伏而不能出陰迫而不能升

應劭曰迫陰迫

陽使不能升也於是地有地震今三川實震是陽失其所而填陰

也應劭曰失其所失其道也填陰為陰所填不得升也師古曰填音竹乃反陽失而在陰原

必塞

師古曰原謂水泉之本也

原塞國必亡夫水土演而民用也

應劭

曰演引也所以引出土氣者也師古曰演音衍

土無所演而民乏財用不亡何

待昔伊雒竭而夏亡河竭而商亡今周德如二代之季

其原又塞塞必竭川竭山必崩夫國必依山山川山崩川

竭亡之徵也若國亡不過十年數之紀也是歲三川竭

岐山崩劉向以為陽失在陰者謂火氣來煎枯水故川

竭也山川連體下竭上崩事勢然也時幽王暴虐妄誅

伐不聽諫迷於褒姒廢其正后

師古曰褒姒褒人所獻之女也正后申后也蓋

白華之詩所為作也廢后之父申侯與犬戎共攻殺幽王一日其

在天文水為辰星辰星為蠻夷月食辰星國以女亡幽

王之敗女亂其內夷攻其外京房易傳曰君臣相背厥

異名水絕有名之水文公九年九月癸酉地震劉向以為

先是齊桓晉文魯僖二伯賢君新沒周襄王失道楚穆

王弑父諸侯皆不肖權傾於下天戒若曰臣下強盛者

將動為害後宋魯晉莒鄭陳齊皆弑君諸震畧皆從董

仲舒說也京房易傳曰臣事雖正專必震其震於水則

波於木則搖於屋則瓦落大經在辟而易臣茲謂陰動

服虔曰經常也辟音刑辟之辟蘇林曰大經五行之常經也在辟衆陰犯殺其上也師古曰辟讀曰僻謂常法

僻壞而易臣也厥震搖政宮大經搖政茲謂不陰厥震搖山山

出涌水嗣子無德專祿茲謂不順厥震動丘陵涌水出

襄公十六年五月甲子地震劉向以為先是鷄澤之

會諸侯盟大夫又盟是歲三月諸侯為溴梁之會而大

夫獨相與盟五月地震矣其後崔氏專齊欒盈亂晉良

霄傾鄭閻殺吳子燕逐其君楚滅陳蔡昭公十九年

五月己卯地震劉向以為是時季氏將有逐君之變其

後宋三臣曹會皆以地叛蔡莒逐其君吳敗中國殺二

君二十三年八月乙未地震劉向以為是時周景王

崩劉單立王子猛尹氏立子朝其後季氏逐昭公黑肱

叛邾吳殺其君僚宋五大夫晉二大夫皆以地叛 哀

公三年四月甲午地震劉向以為是時諸侯皆信邪臣

莫能用仲尼盜殺齊侯齊陳乞弑君 貞定王三年晉

空桐震七日臺舍皆壞人多死

秦始皇十五年地動 十七年地動自樂徐以西至平
陰臺屋墻垣大半壞

漢惠帝二年正月地震隴西厭音一甲反四百餘家 文帝

五年二月地震 景帝後元年五月地震 武帝元光

四年五月地震 征和二年八月地震壓殺人 後元

元年秋七月地震 宣帝本始四年四月壬寅地震河

南以東四十九郡北海琅邪地震壞祖宗廟城郭殺六

千餘人 地節二年九月壬申地震 元帝初元二年

二月戊午地震隴西郡毀落太上皇廟殿壁木飾壞敗
城郭宮寺民廬壓殺人衆 永光三年冬地震 成帝
建始三年地震 綏和二年九月丙辰地震自京師至
北邊郡國三十餘壞城郭凡殺四百一十五人

王莽天鳳三年二月乙酉地震

後漢世祖建武二十二年九月郡國四十二地震南陽
尤甚地裂壓殺人其後武谿蠻夷反為寇害至南郡發
荊州諸郡兵遣武威將軍劉尚擊之為夷所圍復發兵

赴之尚遂為所沒 章帝建初元年三月甲申山陽東

平地震 和帝永元四年六月丙辰郡國十三地震春

秋漢含孳曰女王盛臣制命則地動坼畔震起山崩淪

時竇太后攝政兄竇憲專權將以是受禍也後五日詔

收憲印綬兄弟就國逼迫皆自殺 五年二月戊午隴

西地震先儒說民安土者也將大動行大震九月匈奴

單于於除難鞬叛遣使發邊郡兵討之 七年九月癸

卯京都地震儒說闔官無陽施猶婦人也是時和帝與

中常侍鄭衆謀奪竇氏權德之因任用之及幸常侍蔡
倫二人始並用權 九年三月庚辰隴西地震閏月塞

外羌犯塞殺畧吏民使征西將軍劉尚擊之 安帝永

初元年郡國十八地震李固曰地者陰也法當安靜今

乃越陰之職專陽之政故應以震動是時鄧太后攝政

專事訖建光中太后崩安帝乃得制政於是陰類並勝

西羌亂夏連十餘年 二年郡國十二地震 三年十

二月辛酉郡國九地震 四年三月癸巳郡國四地震

五年正月丙戌郡國十地震 七年正月壬寅二月

丙午郡國十八地震 元初元年郡國十五地震 二

年十一月庚申郡國十地震 三年二月郡國十地震

十一月癸卯郡國九地震 四年郡國十三地震 五

年郡國十四地震 六年二月乙巳京都郡國四十二

地震或地坼裂涌水壞敗城郭民室屋壓人冬郡國八

地震 永寧元年郡國二十三地震 建光元年九月

己丑郡國三十五地震或地坼裂壞城郭室屋壓殺人

是時安帝不能明察信宮人及阿母聖等讒云破壞鄧太后家於是專聽信聖及宦者中常侍江京樊豐等皆得用權 延光元年七月癸卯京都郡國十三地震三月戊申郡國二十七地震 二年京都郡國三十二地震 三年京都郡國二十三地震是時以讒免太尉楊震廢太子 四年十月丁巳京都郡國十六地震時安帝既崩閻太后攝政弟兄閻顯等並用事遂斥安帝子更徵諸國王子未至中黃門遂誅顯兄弟 順帝永建

三年正月丙子京都漢陽地震漢陽屋壞殺人地坼涌
水出是時順帝阿母宋娥及中常侍張昉等用權 陽

嘉二年四月己亥京都地震是時爵號宋娥為山陽君
四年十二月甲寅京都地震 永和二年四月庚申

京都地震是時宋娥構姦誣罔五月事覺收印綬歸田
里十一月丁卯京都地震是時太尉王龔以中常侍張
昉等專弄國權欲奏誅之時龔宗親有以楊震行事諫
之止云 三年二月乙亥京都金城隴西地震裂城郭

室屋多壞壓殺人閏月己酉京都地震十月西羌二千餘騎入金城塞為涼州害 四年三月乙亥京都地震

五年二月戊申京都地震 建康元年正月涼州都

郡六地震從去年九月以來至四月凡百八十日震山

谷坼裂壞敗城寺傷害人物三月護羌校尉趙冲為叛

胡所殺九月丙午京都地震是時順帝崩梁太后攝政欲為順帝作陵制度奢廣多壞吏民冢尚書樂巴諫事

太后怒癸卯詔書收巴下獄欲殺之丙午地震於是太

后乃出巴免為庶人 桓帝建和元年四月庚寅京都

地震九月丁卯京都地震是時梁太后攝政兄冀持權

至和平元年太后崩然冀猶秉政專事至延熹二年乃

誅滅 三年九月己卯地震庚寅又震 元嘉元年十

一月辛巳京都地震 二年正月丙辰京都地震十月

乙亥京都地震 永興二年二月癸卯京都地震 永

壽二年十二月京都地震 延熹四年京都右扶風涼

州地震 五年五月乙亥京都地震是時桓帝與中常

侍單超等謀誅除梁冀聽之並使用事專權又鄧后本

小人性行無常苟有顏色立以為后後卒坐執左道廢

以憂死 八年九月丁未京都地震 靈帝建寧四年

二月癸卯地震是時中常侍曹節王甫等皆專權 熹

平二年六月地震 六年十月辛丑地震 光和元年

二月辛未地震四月丙辰地震靈帝時宦者專恣 二

年三月京兆地震 三年自秋至明年春酒泉表氏地

八十餘動涌水出城中官寺民舍皆傾縣易處更築城

郭獻帝初平二年六月丙戌地震 興平元年六月
丁丑地震 後主炎興二年蜀地震時宦人黃皓專權
按司馬彪說閹宦無陽施猶婦人也皓見任之應與漢
和帝時同事也是冬蜀亡

魏明帝青龍二年十一月京都地震從東來隱隱有聲
搖屋瓦 景初元年六月戊申京都地震是秋吳將朱
然圍江夏荊州刺史胡質擊退之又公孫淵叛自立為
燕王改元置百官明年討平之

齊王正始二年十一月南安郡地震 三年七月甲申

南安郡地震十二月魏郡地震 六年二月丁卯南安

郡地震時曹爽專政遷太后於永寧宮后與帝泣別連
年地震是其應也

吳孫權黃武四年江東地震連震時權受魏爵命為大將
軍吳王而改元專制不修臣迹京房易傳曰臣事雖正
專必震劉向云臣下強盛將動而為害之應也 嘉禾

六年五月江東地震 赤烏二年正月地再震時呂壹

專事步騭上疏以為臣下專政之應 赤烏十一年二月江東地仍震時權聽讒尋黜朱據廢太子

晉武帝泰始五年四月辛酉地震是年冬新平氐羌叛明年孫皓遣大衆入渦音口七年六月丙申地震

咸寧二年八月庚辰河南河東平陽地震 四年六月

丁未陰平廣武地震甲子又震 太康二年二月庚申

淮南丹陽地震 五年三月朔壬辰京師地震 六年

七月己丑地震 七年七月南安犍其焉反為地震八月

京兆地震 八年五月壬子建安地震七月陰平地地震

八月丹陽地震 九年正月會稽丹陽吳興地震四月

辛酉長沙南海等郡國八地震七月至於八月地又四

震其三有聲如雷九月臨賀地震十二月又震 十年

十二月己亥丹陽地震 太熙元年正月地又震武帝

世始於賈充終於楊駿阿黨昧利苟竊朝權至於末年

所任轉弊故頻年地震過其序也終喪天下 惠帝元

康元年十二月辛酉京師地震此夏賈后使楚王瑋殺

汝南王亮及太保衛瓘此陰道盛陽道微故也 四年

二月上谷上庸遼東地震五月蜀郡山移淮南壽春洪

水出山崩地陷壞城府八月上谷地震水出殺百餘人

十月京都地震十一月滎陽襄城汝陰梁國南陽地皆

震十二月京都又震是時賈后亂朝終至禍敗之應也

漢鄧太后攝政時郡國地震李固以為地陰也法當安

靜今乃越陰之職專陽之政故應以震此同事也京房

易傳曰小人剝廬厥妖山崩茲謂陰乘陽弱勝彊又曰

陰背陽則地裂父子分離夷羗叛去 元康五年五月

丁丑地震六月金城地震 六年正月丁丑地震 八

年正月庚辰地震 太安元年十二月地震時齊王冏

專政之應也 二年十二月庚辰地震是時長沙王乂

專政之應也 孝懷帝永嘉三年十月荆襄二州地震

時司馬越專政 四年四月兗州地震五月石勒寇汲

郡執太守胡寵遂南濟沔是其應也 愍帝建興二年

四月甲辰地震 三年六月丁卯長安又震時主幼權

傾於下四方雲擾兵亂不息之應也 元帝太興元年

四月西平地震湧出水十二月廬陵豫章武昌西陵地震涌水出山崩于寶以為王敦陵上之應也 二年五

月己丑祁山地震山崩殺人是時相國南陽王保在祁山稱晉王不終之象也 三年四月庚寅丹陽吳郡晉

陵又地震 成帝咸和二年二月江陵地震三月益州地震四月己未豫州地震是年蘇峻作亂 九年三月

丁酉會稽地震 穆帝永和元年六月癸亥地震是時

嗣主幼冲母后稱制政在臣下所以連年地震 二年

十二月地震 三年正月庚辰地震九月又地震 四

年十月己未地震 五年正月庚寅地震是時石季龍

僭即皇帝位亦過其序也 九年八月丁酉京都地震

有聲如雷 十年正月丁卯地震聲如雷鷄雉皆鳴响

呼后反 十一年四月乙酉地震五月丁未地震 升平

二年十一月辛酉地震 五年八月涼州地震 哀帝

隆和元年四月甲戌地震是時政在將相人主南面而

已 興寧元年四月甲戌揚州地震湖瀆溢 二年三
月庚寅江陵地震是時桓溫專政 海西公太和元年
二月涼州地震水涌是海西將廢之應也 簡文帝咸
安二年十月辛未安成地震是年帝崩 孝武帝寧康
元年十月辛未地震 二年二月丁巳地震七月甲午
涼州地又震山崩是時嗣主幼冲權在將相陰盛之應
也 太元二年閏三月壬午地震五月丁丑地震 十
一年六月己卯地震是後緣河諸將連歲兵役人勞之

應也 十五年三月己酉朔夜地震八月京都地震十

二月己未地震 十七年六月癸卯地震十二月己未

地又震是時羣小弄權天下側目 十八年正月癸亥

朔地震二月乙未夜地震 安帝隆安四年四月乙未

地震九月癸丑地震是時幼主冲昧政在臣下 義熙

四年正月壬子夜地震有聲十月癸亥地震 五年正

月戊戌夜潯陽地震有聲如雷明年盧循下 八年自

正月至四月南康廬陵地四震明年王旅西討荆益

十年三月戊寅地震

宋武帝永初元年秋七月己巳地震 文帝元嘉十二

年夏四月都下地震 十五年七月辛未地震 孝武

大明二年四月辛丑地震 六年七月甲申地震有聲

如雷兗州尤甚魯郡山搖者二 後廢帝元徽五年五

月地震

齊東昏侯永元元年七月地震至來歲晝夜不止小屋

多壞

梁武帝天監五年十二月京師地震京房易飛候曰地

動以下十一月者其邑飢亡時交州刺史李凱反明年

霜歲儉人飢 普通三年正月建康地震時義州刺史

文僧朗以州叛 六年十二月地震京房易飛候曰地

冬動有音以十二月者其邑有行兵是時帝令豫章王

綜將兵北伐 中大通五年正月建康地震京房易飛

候曰地以春動歲不昌是歲大水百姓飢饉 大同三

年十一月建康地震京房易飛候曰地震以十一月邑

有大喪及飢亡明年霜為災百姓饑 五年十月建康
地震是歲會稽山賊起 七年二月建康地震是歲交
州人李賁舉兵逐刺史蕭諮 九年閏正月地震李賁
自稱皇帝署置百官 太清三年四月建康地再震時
侯景自為大丞相錄尚書事帝所須不給是月以憂憤
崩

陳永定二年五月建康地震時王琳立蕭莊於郢州

太建四年十一月地震陳寶應反閩中 禎明元年正

月地震施文慶沈客卿專恣之應也

後齊河清二年并州地震和士開專恣之應

後周建德二年涼州地頻震城郭多壞時羌夷叛

隋文帝開皇十四年五月京師地震京房易飛候曰地
動以夏五月人流亡是歲關中饑百姓就糧於關東

二十年十一月戊子立晉王廣為皇太子是日天下地
震仁壽二年四月岐雍地震易飛候曰震以四月五
穀不熟人大饑

唐武德二年十月乙未京師地震陰盛而反常則地震
故其占為臣強為后妃專恣為夷犯華為小人道長為
寇至為叛臣 七年七月雋州地震山摧壅江水噎流

貞觀七年十月乙丑京師地震 十二年正月壬寅

松叢二州地震壞廬舍 二十年九月辛亥靈州地震
有聲如雷 二十三年八月癸酉朔河東地震晉州尤
甚壓殺五十餘人乙亥又震十一月乙丑又震 永徽
元年四月己巳朔晉州地震己卯又震六月庚辰又震

有聲如雷 二年十月又震十一月戊寅定襄地震帝

始封晉王初即位而地屢震天下將由帝而動搖象也

儀鳳二年三月庚辰京師地震 永淳元年十月甲

子京師地震 垂拱三年十月乙亥京師地震 四年

七月戊午又震八月戊戌神都地震 延載元年四月

壬戌常州地震 大足元年七月乙亥揚楚常潤蘇五

州地震 二年八月辛亥劔南六州地震 景龍四年

五月丁丑剡縣地震 景雲三年正月甲戌并汾絳三

州地震壞廬舍壓死百餘人 開元二十二年二月壬

寅秦州地震西北隱隱有聲坼而復合經時不止壞廬

舍殆盡壓死四千餘人 二十六年三月癸巳京師地

震 至德元載十一月辛亥朔河西地震裂有聲陷廬

舍張掖酒泉尤甚至二載三月癸亥乃止 大歷二年

十一月壬申京師地震自東北來有聲如雷者三 三

年五月丙戌又震 十二年恒定二州地大震三日乃

止東鹿寧晉地裂數丈沙石隨水流出平地壞廬舍壓

死數百人 建中元年四月己亥京師地震 三年六

月甲子又震 四年四月甲子又震五月辛巳又震

貞元二年五月己酉又震 三年十一月丁丑夜京師

東都蒲陝地震 四年正月庚戌朔夜京師地震辛亥

壬子丁卯戊辰庚午癸酉甲戌乙亥皆震金房二州尤

甚江溢山裂屋宇多壞人皆露處二月壬午京師又震

甲申乙酉丙申三月甲寅己未庚午辛未五月丙寅丁

卯皆震 八年甲午又震有聲如雷甲辰又震 九年

四月辛酉又震有聲如雷河中闕輔尤甚壞城壁廬舍

地裂水涌 十年四月戊申京師地震癸丑又震侍中

渾瑊第有樹湧出樹枝皆載蚯蚓 十三年七月乙未

又震 元和七年八月京師地震草樹皆搖 九年三

月丙辰蕩州地震晝夜八十壓死百餘人地陷者三十

里 十年十月京師地震 十一年二月丁丑又震

十五年正月穆宗即位戊辰始朝羣臣於宣政殿是夜

地震 太和二年正月壬申地震 七年六月甲戌又

震 九年三月乙卯京師地震屋瓦皆墜戶牖間有聲

開成元年二月乙亥又震 二年十一月乙丑夜又

震 四年十一月甲戌又震 會昌二年正月癸亥宋

亳二州地震十二月癸未京師地震 大中三年十月

辛巳上都及振武河西天德靈武鹽夏等州地震壞廬

舍壓死數十人 十二年八月丁巳太原地震 咸通

元年五月上都地震 六年十二月晉絳二州地震壞

廬舍地裂泉湧泥出青色 八年正月丁未河中晉絳

三州地大震壞廬舍人有死者 十三年四月庚子朔

浙東西地震 乾符三年六月乙丑雄州地震至七月

辛巳止州城廬舍盡壞地陷水涌傷死甚衆是月濮州

地震十二月京師地震有聲 四年六月庚寅雄州地

震 六年二月京師地震有聲如雷藍田山裂水涌

中和三年秋晉州地震有聲如雷 光啓二年春成都

地震月中十數占曰兵饑十二月魏州地震 乾寧二

年三月庚午河東地震

宋乾德三年京師地震 至道二年十月潼關西靈夏
環慶等州地震城郭廬舍多壞占云兵饑是時西戎寇
靈州明年遣將率兵援糧以救之關西民有饑殍者

咸平二年九月常州地震壞鼓角樓羅務軍民廬舍甚
衆 四年九月慶州地震者再 六年正月益州地震

景德元年正月丙申夜京師地震癸卯夜復震丁未
夜又震屋宇皆動有聲移時方止癸丑冀州地震占主
土工興有急令兵革興是年契丹犯塞二月益黎雅州

地震三月邢州地震不止四月己卯夜瀛州地震五月

邢州地復震不止十一月壬子日南至京師地震癸丑

石州地震 四年七月丙戌益州地震己丑渭州瓦亭

寨地震者四 大中祥符二年三月代州地震 四年

六月昌眉州並地震七月真定府震壞城壘 天聖五

年三月戊辰秦州地震 七年十月丙午京師地震

景祐四年十二月甲申忻代并三州地震壞廬舍覆壓

吏民忻州死者萬九千七百四十二人傷者五千六百

五十五人畜死者五萬餘代州死者七百五十九人并
州千八百九十人 寶元元年正月庚申并忻代州地

震十一月忻州地震十二月甲子京師地震 慶歷三
年五月乙亥忻州地大震說者曰地道貴靜今數震搖
兵興民勞之象也五月庚午忻州地震西北有聲如雷

五年七月丁酉廣州地震已卯京南岳州並地震

六年二月戊寅青州地震三月庚寅登州地震岨嶠山
摧自是震不已每震即海底有聲如雷五月甲申京師

地震 七年十月乙丑河陽許州地震 二年十一月

丁酉夜秀州地震有聲自西北起如雷 嘉祐二年雄

霸等州地震 五年五月己丑京師地震 治平四年

秋漳泉建州邵武興化軍等處皆地震潮州尤甚地裂

泉涌壓覆州郭及兩縣屋宇士民軍兵死者甚衆八月

己巳京師地震 熙寧元年七月甲申地震乙酉辛卯

再震八月壬寅甲辰又震是月鄆州須城東阿二縣地

震終日滄州清池莫州亦震壞官私廬舍城壁是時河

北復大震或數刻不止有聲如雷樓櫓民居多摧覆壓

死者甚衆九月戊子莫州地震有聲如雷十一月乙未

京師及莫州地震十二月癸卯瀛州地大震丁巳冀州

地震辛酉滄州地震涌出沙泥船板胡桃螺蚌甲之屬

十二月潮州地再震是歲數路地震有一日十數震有

踰半年震不止者 元豐八年五月京師地震 元祐

二年二月辛亥代州地震有聲 四年春陝西河北震

七年九月己酉蘭州鎮戎軍永興軍地震十月庚戌

朔環州地再震 紹聖元年十一月丙寅太原府地震

二年十月十一月河南府地震是歲蘇州自夏迄秋
地震 三年三月戊戌夜劔南東川地震九月己酉滁
州沂州地震 四年六月己酉太原府地震有聲 元

符元年七月壬申夜雲霧蔽天地震良久 三年正月

壬申恩州地震八月甲戌太原府地震 三年五月己

巳太原府又震 建中靖國元年十二月辛亥太原府

潞晉隰代石嵐等州岢嵐威勝保化寧化軍地震彌旬

晝夜不止壞城壁屋宇人畜多死 宣和四年北方用

兵雄州地震 六年正月京師連日再地震宮殿門皆

動有聲 建炎二年正月戊戌長安地大震金人將婁

宿圍城彌旬無外援金兵乘地震而入城遂陷 紹興

三年八月甲申地震平江府湖州尤甚

甲辰詔罪已求直言

是歲

逆豫陷鄧隨等州金人犯蜀臣犯君夷犯華之應也

六年六月乙巳夜地震有聲自西北如雷餘杭縣為甚

詔罪已求直言

是冬偽齊劉麟犯順寇濠壽州後四年金遣

兀术入寇 二十四年正月戊寅地震 二十五年三

月壬申又震 二十八年八月甲寅地夜震 三十一

年三月壬辰又震 三十二年七月戊申又震 隆興

元年十月丁丑地震六月甲寅又震是歲宰臣湯思退

擅撤海泗唐鄧之戍金乘邊虛入寇後思退貶死此臣
專必震又兵役人勞之應也 乾道二年九月丙午地

震自西北方是月台州有海寇 四年十二月壬子石

泉軍地震三日有聲如雷屋瓦皆落時郡有綿州寃獄

云 淳熙元年十二月戊辰地震自東北方後湖南江西茶寇擾數路 九年十二月壬寅地夜震 十年十二月丙寅又震 十二年五月庚寅又震 慶元六年十一月甲子地震東北方 嘉定六年四月行都地震 六月丙子嚴州淳安縣地震 十年二月庚申地震自東南越月金犯光州 十四年正月乙未地夜震大雷 是春金人入寇蘄黃州失守

文獻通考卷三百一

欽定四庫全書薈要卷九千六百二十四

史部

文獻通考卷三百二

鄱陽馬端臨貴與著

物異考八

山崩地陷地移地長川竭

春秋釐公十四年秋八月辛卯沙麓崩穀梁傳曰林屬

於山曰麓

師古曰屬聯也音之欲反

沙其名也劉向以為臣下背叛

散落不事上之象也先是齊桓行伯道會諸侯

師古曰伯讀曰

霸其下亦同事周室管仲既死桓德日衰天戒若曰伯道將

廢諸侯散落政逮大夫陪臣執命臣下不事上矣桓公

不寤天子蔽晦

師古曰被掩蔽而暗也

及齊桓死天下散而從楚

王札子殺二大夫

師古曰二大夫召伯毛伯也

晉敗天子之師

師古曰謂

敗之於貿戎也

已解於上也莫能征討從是陵遲公羊以為沙麓河

上邑也董仲舒說畧同一曰河大川象齊大國桓德衰

伯道將移於晉文故河為徙也左氏以為沙麓晉地沙

山名也地震而麓崩不書震舉重者也伯陽甫所謂國

必依山川山崩川竭亡之徵也不過十年數之紀也至

二十四年晉懷公殺於高粱

師古曰懷公謂子圉惠公之子也文公入國而使殺

之高梁
晉地

京房易傳曰小人剝廬

師古曰剝卦上九爻之辭

厥妖山崩

茲謂陰乘陽弱勝強成公五年夏梁山崩穀梁傳曰

靡河三日不流

師古曰靡讀曰雍

晉君帥羣臣而哭之廼流

師古

曰從伯宗用輦者之言

劉向以為山陽君也水陰民也天戒若曰

君道崩壞下亂百姓將失其所矣哭然後流喪亡象也

梁山在晉地自晉始而及天下也後晉暴三卿厲公以

殺董仲舒說畧同劉歆以為梁山晉望也崩弛崩也古者三代命祀祭不越望吉凶禍福不是過也國主山川山崩川竭亡之徵也美惡周必復是歲歲在鶉火至十七年復在鶉火欒書中行偃弒厲公而立悼公

威烈王十三年晉河岸崩壅龍門至於底柱

漢高后二年正月武都山崩殺七百六十八人地震至八月廼止 文帝二年四月齊楚地山二十九所同日俱大發水潰出劉向以為近水沴土也天戒若曰勿盛齊

楚之君今失制度將為亂後十六年帝庶兄齊悼惠王

之孫文王則薨無子帝分齊地立悼惠王庶子六人皆

為王師古曰謂齊孝王將閭濟北王志菑川王賢膠東王雄渠膠西王卬濟南王辟光賈誼鼂

錯諫以為違古制恐為亂至景帝三年齊楚七國起兵

百餘萬漢皆破之春秋四國同日災師古曰宋衛陳鄭漢七國

同日衆山潰咸被其害不畏天威之明效也 成帝河

平三年二月丙戌犍為柏江山崩捐江山崩皆靡江水

師古曰靡讀曰壅次下亦同江水逆流壞城殺十三人地震積二十

一日百二十四動 元延三年正月丙寅蜀郡岷山崩

靡江水逆流三日廼通劉向以為周時岐山崩三川竭

而幽王亡岐山者周所興也漢家本起於蜀漢今所起

之地山崩川竭星孛又及攝提大角從參至辰

如淳曰孛星尾

長及攝提大角始發於參至辰也 殆必亡矣其後三世亡嗣王莽篡位

王莽天鳳三年長平館西岸崩靡涇水不流毀而北

行

後漢和帝永元元年七月會稽南山崩會稽南方大名

山也京房易傳曰山崩陰乘陽弱勝強也劉向以為山陽君也水陰民也君道崩壞百姓失所也劉歆以為崩猶弛也是時竇太后攝政兄竇憲專權七年七月趙國易陽地裂京房易傳曰地裂者臣下分離不肯相從也是時南單于衆乖離漢軍追討十二年夏四月戊辰南郡秭歸山高四百丈崩填谿殺百餘人明年冬至蠻夷反遣使募荊州吏民萬餘人擊之元興元年五月癸酉右扶風雍地裂是後西羌大寇涼州殤帝延

平元年五月壬辰河東恒山崩是時鄧太后專政秋八

月殤帝崩 安帝永初元年六月丁巳河東楊地陷東

西百四十步南北百二十步深三丈五尺 六年六月

壬辰豫章員谿原山崩各六十三所 元初元年三月

己卯日南地坼長百八十二里其後三年正月蒼梧鬱

林合浦盜賊羣起劫畧吏民 二年六月河南雒陽新

城地裂 延光二年七月丹陽山崩四十七所 三年

六月庚午巴郡閬中山崩 四年十月丙午蜀郡越雋

山崩殺四百餘人丙午天子會日也是時閻太后攝政
其十一月中黃門孫程等殺江京立順帝誅閻后兄弟
明年閻后崩 順帝陽嘉二年六月丁丑雒陽宣德亭
地坼長八十五丈近郊地時李固對策以為陰類專恣
將有分離之象所以附郊城者是上帝示象以誡陛下
也是時宋娥及中常侍各用權分爭後中常侍張逵豫
政與大將軍商爭權為商作飛語欲陷之 桓帝建和
三年四月郡國六地裂水涌出井溢壞寺屋殺人時梁

太后攝政兄冀枉殺李固杜喬 三年郡國五山崩

和平元年七月廣漢梓潼山崩 永興二年六月東海

朐山崩冬十二月泰山瑯邪盜賊羣起 永壽二年七

月河東地裂時梁皇后兄冀秉政桓帝欲自由內患之

延熹元年七月乙巳左馮翊雲陽地裂 三年五月

戊申漢中山崩是時上寵恣中常侍單超等 四年六

月庚子泰山博尤來山判解 八年六月丙辰緱氏地

裂 永康元年五月丙午雒陽高平永壽亭上黨泫元工

反氏地各裂是時朝臣患中常侍王甫等專恣冬桓帝崩明年竇氏等欲誅常侍黃門不果更為所誅靈帝建寧四年五月河東地裂十二處裂各長十里百七十步廣者三十餘步深不見底

魏元帝咸熙二年二月太行山崩此魏亡之徵也其冬晉有天下

吳孫權赤烏十三年八月丹陽句容及故鄣寧國諸山崩鴻水溢劉歆以為國主山川山崩川竭亡之徵也吳

雖稱帝其實列國災發丹陽天意見之後二年而權薨
又二十六年而吳亡

晉武帝泰始三年三月戊午太石山崩 四年七月泰

山崩墜三里京房易傳曰自上下者為崩厥應泰山之

石顛而下聖人受命人君虜及帝晏駕而祿去王室惠

皇悞弱懷愍二帝俱辱虜庭淪胥於北元帝中興於南

此其應也 太康五年庚午宣帝廟地陷 六年十月

南安新興山崩湧水出 七年二月朱提

殊匙
二音

之大瀘

山崩震壞郡舍陰平之仇池崖隕 八年七月大雨殿

前地陷方五尺深數丈中有破船 惠帝元康四年蜀

郡山崩殺人五月壬子壽春山崩洪水出城壞地陷方

三十丈殺人六月壽春大雷山崩地坼人家陷死上庸

郡亦如之八月居庸地裂廣三十六丈長八十四丈水

出大饑上庸四處山崩地墜廣三十丈長一百三十丈

水出殺人皆賈后亂朝之應也 太安元年四月西壙

崩 懷帝永嘉元年三月洛陽東北步廣里地陷 二

年八月乙亥鄆城無故自壞七十餘丈司馬越惡之遷於濮陽此見沴之異也越卒以陵上受禍 三年七月

戊辰當陽地裂三所廣三丈長三百餘步京房易傳曰地坼裂者臣下分離不肯相從也其後司馬越苟晞交惡四方牧伯莫不離散王室遂亡 三年十月宜都夷

道山崩 四年四月湘東鄴黑石山崩 元帝太興元

年二月廬陵豫章武昌西陽地震山崩 二年五月祁

山地震山崩殺人 三年南平郡山崩出雄黃數千斤

時王敦陵傲帝優容之示含養禍萌也 四年八月常

山崩水出滹沱

上火乎反
下音陀

盈溢大木傾拔

成帝咸和

四年十月柴桑廬山西北崖崩十二月劉允為郭默所

殺 穆帝永和七年九月峻平崇陽二陵崩 十二年

十一月遣散騎常侍車灌修峻平陵開埏道崩壓殺數

十人 升平五年二月南掖門馬足陷地得鐘一有文

四字 哀帝隆和元年四月丁丑浩亶

上古合反
下音門

山崩

張天錫亡徵也 安帝義熙八年三月壬寅山陰地陷

方四丈有聲如雷 十年五月戊寅西明門地穿涌水
出毀門扇及限此水沴土也 十一年五月霍山崩出
銅鐘六枚 十三年七月漢中城固縣水涯有聲若雷
既而岸崩出銅鐘十有二枚 惠帝元康九年六月夜
暴雷雨賈謚齋屋柱陷入地壓謚牀帳此木沴土失
其性不能載也明年謚誅焉 光熙元年五月范陽國
地燃可以爨此火沴土也是時禮樂征伐自諸侯出

梁武帝普通二年始平郡石鼓村地自開成井方六丈

六尺深三十二丈

後魏孝靜帝武定二年十一月西河地陷有火出京房
易傳占曰地自陷其君亡祖暉曰火陽精也地陰主也
地燃越陰之道行陽之政臣下專恣終以自害時齊神
武作宰侯景專擅河南神武崩景作亂

後周武帝建德二年涼州地震裂出泉

隋高祖仁壽三年梁州就谷山崩洪範五行傳曰崩散
落背叛不事上之類也梁州為漢地明年漢王諒反

煬帝大業七年砥柱山崩壅河逆流數十里時帝興遼東之役四海怨叛卒以滅亡

唐太宗貞觀八年七月隴右山摧山者高峻自上而隕之象也 武后垂拱二年九月己巳雍州新豐縣露臺鄉大風雨震電有山湧出高一十丈有池周三百畝池中有龍鳳之形禾麥之異武后以為休應名曰慶山荆州人俞文俊上言天氣不和而寒暑隔人氣不和而贅疣生地氣不和而堆阜出今陛下以女主居陽位反易

剛柔故地氣隔塞山變為災陛下以為慶山臣以為非
慶也宜側身修德以答天譴不然恐災禍至后怒流於
嶺南 永昌中華州赤水南岸大山晝日忽風昏有聲
隱隱如雷頃之漸移東數百步壅赤水壓張村民三十
餘家高二百餘丈水深三十丈坡上草木宛然金滕曰
山徙者人君不用道祿去公室賞罰不由君佞人執政
政在女主不出五年有走王 玄宗開元十七年四月
乙亥大風震電藍田山摧裂百餘步畿內山也國主山

川山摧川竭亡之證也占曰人君德消政易則然天

寶十一載六月虢州閩鄉黃河中女媧墓因大雨晦冥

失所在至肅宗乾元二年六月乙未瀕河人聞有風雷

曉見其墓湧出下有巨石上有雙柳各長丈餘時號風

陵堆占曰塚墓自移天下破代宗大歷六年四月戊

寅藍田西原地陷九年十一月戊戌同州夏陽有山

徙於河上聲如雷十三年郴州黃岑山摧壓死者數

百人德宗建中二年霍山裂魏州魏縣西四十里地

數畝忽長崇數尺 憲宗元和八年五月丁丑大隗山
摧 十五年七月丁未苑中土山摧壓死二十人 僖
宗光啓三年四月維州山崩累日不止塵坌亘天壅江
水逆流占曰國破

後唐明宗長興三年七月夔州奏赤甲山崩

宋太宗雍熙三年階州福清縣青龍峽山圯壅白江水
逆流高十丈許壞民田數百里 淳化三年五月雅州
名山縣大風雨登遼山圯壅江水逆流入民田壞稼

真宗咸平元年七月庚午寧化軍汾水漲壞北水門山

石摧圮軍士有壓死者 二年七月庚寅陝州靈寶縣

暴雨崖圮壓居民死者二十二戶 三年三月辛丑夜

秦州大澤縣三陽寨大雨崖摧壓死者六十二人 四

年正月秦州成紀縣山摧壓死六十餘人 景德四年

七月秦州成紀縣崖圮殺居民 天禧五年五月襄州

鳳林鎮道側湧起高三尺許長三丈闊八尺知州夏竦

以聞 神宗熙寧元年潭州益陽縣雷震山裂出米

二年十月庚戌南郊東壝門內地陷有天寶十二載古

墓 五年九月丙寅華州少華山前阜頭峯越八盤嶺

及谷摧陷於石子坡東西五里南北十里潰散墳裂湧

起堆阜各高數丈長若隄岸至陷居民六社凡數百戶

林木廬舍亦無存者並山之民言數年以來峯上常有

聲是夜初昏畧無風雨山上忽霧起有聲漸大地遂震

動不及食頃而山摧 元豐八年二月甲戌賓州嶺方

縣地陷 哲宗元祐元年十二月華州鄭縣界小敷谷

山頽傷居民 徽宗宣和七年七月己亥熙河路地震

有裂數十丈者蘭州尤甚陷數百家倉庫俱沒 高宗

紹興十二年十二月陝西不雨五穀焦枯涇渭灞澧皆

竭伯陽甫曰國必依山山川摧川竭亡之證也時秦民

以餓離散壯者為北人所買郡邑遂空劉向以為陽失

在陰者謂火氣來煎枯水故川竭山川連體下竭上必

摧占曰君德消政易則然京房易傳曰君臣相背厥異

名水絕 光宗紹熙四年秋南岳祝融峯有山自摧劍

門闕山摧 五年十二月臨安府南高峯山自摧 寧

宗慶元二年六月辛未台州黃岩縣大雨水有山自徙
五十里餘聲如雷草木塚墓皆如初而故址為淵潭時
臨海縣清潭山亦自移唐志載金滕曰山徙者君不用
道祿去公室賞罰不由君佞人執政也此韓侂胄擅朝
之應 嘉泰二年七月丁未閩建安縣山摧民廬之壓
者六十餘家 嘉定六年六月丙子浙淳安縣長樂鄉
山摧水湧近水沴土也京房易傳曰小人剝廬厥妖山

摧劉向以為山陽君也水陰民也君道壞下亂百姓將失其所又曰臣下背叛散落不事上之象也 八年五月行都久不雨百川皆竭淮甸亦如之

地生異物

魏公孫淵時襄平北市生肉長圍各數尺有頭目口喙

無手足

詳見赤祥門

晉惠帝元康五年呂縣有流血百餘步

詳見赤祥門

懷帝

永嘉元年洛陽地陷有蒼白鵝出

詳見羽蟲之異

元帝太興

二年廬江灑縣何旭家忽聞地中有犬子聲掘之得一

母犬與二子一雄一雌詳見犬禍門又孫無終家地坼得狗

同上並見犬禍門成帝咸康初地生毛 孝武帝太元二年

地生毛 十四年京都地生毛 十七年地生毛 安

帝隆安四年地生毛或白或黑 元興三年五月江陵

地生毛 義熙三年十三年地並生毛

齊高帝建元元年荊州天井湖出綿人用與常綿不異

梁武帝大同二年地生白毛長二尺詳見白祥門

北齊武成河清元年九月滄州及長城下地多生毛或
白或黑長四五寸

唐武后垂拱元年九月淮南地生毛或白或蒼長者尺
餘遍居人牀下揚州尤甚大如馬鬣焚之臭如燎毛占
曰兵起民不安 三年魏州地出鐵如船數十丈武威
郡石化為麵貧乏者取以給食 玄宗天寶十三載汝
州葉縣南有土塊鬪中有血出數日不止 德宗建中
四年四月京師地生毛或黃或白有長尺餘者 貞元

四年四月淮南及河南地生毛 文宗太和二年六月

蘇州地生毛 四年石生麵貧者食之

宋神宗熙寧元年潭州益陽縣雷震山裂出米可十萬斛炊之成飯而腥不可食至京師信米也但色黑如炭

八年杭州鹽官縣自三月地產物如珠可食

詳見穀異門

元豐三年青州臨朐益都石化為麵民取食之

黃青黃祥

漢昭帝元鳳元年九月燕有黃鼠銜其尾舞王宮端門

中見鼠妖門成帝建始元年四月辛丑夜西北有火光壬

寅晨大風從西北起雲氣赤黃四塞天下終日夜著地者黃土塵也是歲帝元舅大司馬大將軍王鳳始用事又封鳳母弟崇庶弟譚等五人皆為列侯哀帝即位封外屬丁氏傅氏周氏鄭氏凡六人為列侯楊宣對曰五侯封日天氣赤黃丁傅復然此殆爵土過制傷亂土氣之祥也京房易傳曰易稱觀其生言大臣之義當觀賢人知其性行推而貢之否則為聞善不與茲謂不知厥

異黃厥咎聳厥災不嗣黃者日上黃光不散如火然有黃濁氣四塞天下蔽賢絕道故災異至絕世也

王莽天鳳元年六月黃霧四塞

後漢昭烈章武二年東伐二月自秭歸進屯夷陵六月秭歸有黃氣見長十餘里廣數十丈後踰旬為陸遜所破近黃祥也

晉惠帝元康四年正月大霧帝時昏眊政非已出故有大霧之妖 元帝太興四年八月黃霧四塞埃氛蔽天

永昌元年十月京師大霧黑氣貫天日無光 明帝

太寧元年正月癸巳黃霧四塞二月又黃霧四塞是時

王敦擅權謀逆愈甚 穆帝永和七年三月涼州大風

拔木黃霧下塵是時張重華納譖出謝艾為酒泉太守

而所任非其人至九年死嗣子見殺是其應也京房易

傳曰聞善不與茲謂不知厥異黃厥咎龍孽厥災不嗣黃

者有黃濁氣四塞天下蔽賢絕道故災至絕世也 孝

武太元八年二月癸未黃霧四塞是時道子專政親近

佞人朝綱方替 安帝元興元年十月庚申朔黃霧昏濁不雨是時桓玄謀逆之應 義熙五年十一月大霧十年十一月又大霧是時帝室衰微臣下權盛兵及土地畧非君有此其應也

宋文帝元嘉二十九年十二月戊辰黃霧四塞次年春元凶劭弒逆

齊武帝永明六年十一月丙戌土氣竟天如烟入人眼鼻三日乃止 八年六月丙申大雷雨有黃光竟天照

地狀如金

梁武帝大同元年天雨土 二年天雨灰其色黃近黃
祥也京房易飛候曰聞善不與茲謂不知厥異黃厥咎
聾厥災不嗣蔽賢絕道之咎也時帝自以為聰明博達
惡人勝已又篤信佛法捨身為奴絕道蔽賢之罰也
簡文帝大寶元年正月天雨黃沙 三年夢丸土而吞
之帝尋為侯景所廢以土囊壓之而斃諸子遇害不嗣
之應也

陳後主時夢黃衣人圍城後主惡之遶城橘樹伐去之
隋高祖受禪後上下通服黃衣未幾隋師攻圍之應也
後周靜帝大象二年天雨細黃土移時乃息與大同元
年同占時宣帝昏狂滋甚其年崩靜帝立禪於隋

隋文帝開皇二年京師雨土時帝懲周室諸侯微弱至
亡乃分封諸子並為行臺專制方面失土之故有土氣
之祥後諸王各謀為逆亂京房易飛候曰天雨土百姓
勞苦而無功時營都邑起仁壽宮頽山堙谷死者大半

唐太宗貞觀七年三月丁卯雨土 二十年閏三月己

酉有黃雲闊一丈東西際天黃為土功 高宗永徽三

年三月辛巳雨土 中宗景龍元年六月庚午陝州雨

土十二月丁丑雨土 玄宗天寶十三載二月丁丑雨

黃土 代宗大歷七年十二月丙寅雨土 德宗貞元

二年四月甲戌雨土 八年二月庚子雨土 文宗太

和八年十月甲子土霧晝昏至於十一月癸丑 開成

元年七月乙亥雨土 懿宗咸通十四年三月癸巳雨

黃土 僖宗中和二年五月辛酉大風雨土 昭宗天
復三年二月雨土天地昏霾 天祐元年閏四月甲辰
大風雨土

宋太宗淳化三年正月乙卯京師雨土占曰小人叛自
後李順盜據益州 英宗治平元年三月辛酉十二月

乙巳雨土 二年三月壬戌雨土十二月己亥雨黃土
神宗熙寧五年十二月癸未七年三月戊午並雨黃
土 八年五月丁丑雨黃土兼細毛 元豐二年十一

月丁亥五年二月乙巳六年四月辛未雨土 哲宗元

祐七年正月戊午天雨塵土主民勞苦 徽宗宣和元

年三月庚午雨土着衣主不肖者食祿 高宗紹興元

年十二月庚辰夜有黃白氣 十一年馮康國言三月

庚申涇州雨黃沙語在金傳及夜妖 十八年十一月

壬辰上御麗正門肆赦天有雲赤黃近黃祥也太史附


秦檜旨奏以為瑞 孝宗乾道四年三月己丑雨土若

塵 淳熙四年二月戊戌五年二月甲申四月丁丑六

年十一月乙丑十一年正月辛卯甲寅十三年正月壬寅皆雨土 十五年九月庚子南方有赤黃氣 光宗
紹熙四年十月甲寅五年四月癸卯皆雨土十月乙未
天有赤黃色占曰是為天變色先赤後黃近黃赤祥也
十一月辛亥雨土



文獻通考卷三百二



總校官庶吉士 臣張能照

校對官修撰 臣張書勳

膳錄監生 臣周志禮